

四庫全書

集部

欽定四庫全書

集部

見素集卷二十五

詳校官中書臣賈鏊

中書臣劉源溥覆勘

覆校官中書臣汪學金

校對官助教臣蔡鎮

謄錄監生臣胡曉春

欽定四庫全書

見素集卷二十五

明 林俊 撰

贊

南京禮部左侍郎樂清章恭毅公忠在朝廷名  
在天地紀述在史官典刑重在後進俊辱公子  
給事順德交獲覽事狀豔慕公益深謹作贊曰  
為而難時而又難奚覲而安楚而毒鍛而又毒奚仰而

告胡以見剛公也斯償胡以見直公也時式疇曰匪天  
公死載完疇曰史亡公世載光天錫公社公穀而齒天  
錫公社公令有孫子

族祖伯安公贊

完樸道散百途競新公樂其獨自序齊民緣達任曠駢  
首進趨公違塵枉辭辟中書孤遊遠蹈體素含真知白  
守黑執謙如盈述作從志歿弗終否吁嗟先生叅軍之  
父宗伯之子

方水庄像

此吾友水庄之像其行樂時也意度閒遠不問可知為  
君軀幹脩偉繪事化之要其妙不在此也東坡自規其  
貌於燈影之間把玩形似謔浪諧笑朱墨之工亦末矣  
毓晦丘樊無求聞達公車不登而鄉曲有令問鹿門谷  
口居然風致种放董英之議無及焉是為寫君之像

題達小像

盛年何自多病達多病又未有丈夫子學成否未得逆

知也皆所宜為念者命作小像進之曰達吾語汝父母  
惟疾之憂夫子所慎在此也念之哉子承父後汝為長  
宗祊汝屬也念之哉形天地間靈而秀於物者人汝形  
貌人也亦具所為人者乎靈而秀於人者士汝巾汝衣  
則士也亦具所以為士者乎汝懷抱之隱道風行業之  
顯然吾不得而知也吾欲汝為子瞻汝弟適子由吾不  
能老泉欲汝為純仁適純禮吾不能希文欲汝為伯子  
適叔子吾不能大中獨汝愧乎哉吾老矣所不能為汝

兄弟及為之念之哉謂子賢愚不足掛懷抱任達語也孰不愛其子教之聖與賢教之的也元亮責子天道苟如此且進杯中物堯夫亦謂望子大賢不知天意從否二賢距拔頽脫流俗外於諸子特未忘情為善由己聖賢可學而至無與於天也借天而言責之子者至矣父見素言

題長城林氏始祖沙公贊有序

公諱沙字用淘林氏入閩黃門侍郎十九世始祖也居

長城惠寬翁父也公起省元為台州知州再為宣州同知三子伯氏通判昌徙穀城季氏節推旻徙梨嶺仲氏提舉寶仍居長城孕祉毓靈駢發遞盛生中允壽壽生評事從楷生太常卿上柱國誕曰三世青雲者誕之子金紫光祿大夫文忠公英英子太常卿定定子鴻臚卿思明也曰五太常者誕英定思明英之弟秦之子太常少卿惟亮也戶部郎中堂者惟亮九世孫縣丞玉者堂之孫至玉子而家始落長城一派亦易舊觀王之孫謙



德甫僑寓隙宇中雖自瀾編氓而拳柯礪節居然古意  
歲時祀事懸金服紫真影列滿家予群兒時從隣壁伺  
之吾祖教授府君語曰是故吾族壁間者皆其祖也一  
孫弗立遂以有今汝曹戒之公侯復始是後宜有興者  
固未宜渠易也故甫過吾家吾祖必引與亢禮是後甫  
之子啓善氏兄弟頗植有家諸孫頗儒業公之後又將  
蟄蟄然起復始行驗矣嗚呼予箕世業也遺書手澤存  
焉耳今夫舊家故族得先世之告身墨蹟十襲傳寶如

弘璧天球刼始祖千百年遺像瞻對有奕者乎宜啓善  
氏之珍愛也展玩慰浣敬作贊詞詞曰古貌長身氣清  
以神索而內之可詳公真襲紫承緋道業允紹窮而遠  
之可觀公世大物屢改公系公支大數屢刼公像公遺  
孰謂鬼神而不執其幾開必先晉安數百年之武貽若  
後長城數十世之傳孰謂天道而斯乃偶然同源分流  
眷言疇昔式告來仍永思無斁

方體安贊

流不易東繪不易素從事中更服儒故步殷敦夏彛古  
物存焉周行蹊徑時命屯焉朝霞夕烟軒冕儻焉宜崇  
而卑會計當焉孰速其歸來鳥飛則倦焉委分食貧全  
真佚老鄉邦則勸焉

五馬行春贊有序

此圖吾友黃文大化州時也勞農勸民守之常職而化  
秉數亂之後人無定心四遠逃難之民與逃死之盜叅  
伍走界上求受厘而民先是時非誅則逐耳公開釋兼

受而民處之故俗耻為盜而盜亦盡化為民菜園我壤  
地實我民版而化成完州公之行春如此贊曰有賢化  
州政是優游無擇奸良並蓄而收毋紐習常干我官紀  
誨諭諄勤家人父子維昔化人沸粥紛麻自公來只始  
室而家維昔逋流骸骨暴露自公來只溢我編戶時勞  
時循于化之鄉我公戾止樹如甘棠愠有惠風早有時  
雨民是飽嬉歌有召父公施不有在貴而貧推而放之  
三族為春翬翬歸鴻叢桂招隱種秫開園德星東井

王石泉贊

維實維畜有舒自履動維雷行靜乃山峙載馳載奔道  
允默存以偃以息賁彼之園于謙有鳴聲搜影跡謂聯  
其翔乃滯其翮莫我有知弗容奚病無成與虧松栢命  
正

鄭岳山贊

韻脫神灑風宣氣融有煜標表黃裳在中冥棘玄鈎心  
迎意會有黃鼎耳文成彪外流電一瞬勁颺八紘目無

寥廓飛走疇爭曰止曰時含章于晦柴立厥中與天日對

竹亭壽意贊

匪附匪岐有虛斯直有美斯亭淨焉如拭遠韻孤標于淇允式霜清玉寒作我金石

山齋行樂贊

撝耀含精指呼五城有翔厥酬以皇厥聲紫氣斗間神物化冶有秘其芒一函天假立厓瘦竹真風送恬舒弗

竟懷伊世之占

黃后峰野服像贊

后峰非時人其小影巾服也殆野之人吾不知吾不知  
心則獨畏也贊曰太始易位售厲瞽真孰與其還我思  
古人維高易揺維白易黑歛以若無安此晦默學由正  
基亦以虛受冥搜廣裒以畜其有絕瑕去類玉潔永寒  
野巾山服曷有其官獨峰亭亭鄉國子眼有宣厥靈締  
是歸晚

睦州公贊

公諱披字茂彥挺特克實年十五手抄六經子史千餘  
卷天寶十一年年二十擢第為將樂令遷潭州刺史澧  
州司馬康州刺史貶臨汀郡曹掾改臨汀令地多山鬼  
作無鬼論鬼竟不妖奏授臨汀別駕知州事風流人化  
治聲聞闕下御史李栖筠奏授太子詹事蘓州別駕賜  
紫金魚袋上柱國解綬四十年志尚高潔寵辱不驚廣  
帥薛景公奏授都督不受故相國常袞曰林公出處猶



龍所居有青蛇白雀之異子九人為刺史寶慶元年以  
蘊恩贈睦州刺史事見唐書贊曰天壽忠烈因生錫氏  
玉鈕金繩鸞停鵠峙溫陵十六我公愈偉氣直道完論  
著無鬼出處猶龍德星萃止休符顯祚嗣九刺史

端州公贊

公諱葦小名曾奴睦州長子初朝散大夫奏授西平太  
守終端州刺史贊曰林顯肇周百葉彌盛自固徙閩寔  
首鉅姓瀛高睦祖三葉從政篤生大宗玄默允敬作刺

上州弗憲有令九侯並列錫類衍慶

江陵公贊

公諱藻字緯乾睦州次子兄弟業文度梨嶺誓曰彼鵠  
彼鵠睨在目堅取乃速二三子無替省試合浦還珠賦  
假寐夢神人語曰何不叙珠去來比悟修曰珠之去也  
山無色兮氛霧冥冥海無光兮空水浩浩珠之來也川  
有媚兮祥風習習地有潤兮生物振振果中第主司柱  
黃裳曰叙珠去來有神助貞元七年擢進士為闕破荒

弟蘊亦明經及第歸復題曰昔向嶺頭題姓字不穿楊  
葉不言歸而今各折一枝桂同向嶺頭聯影飛初容州  
吏使殿中侍御史內供奉嶺南節度副使終江陵府使  
郡守陳偉祠于學事見唐書贊曰華夷軫懷遐農負耻  
相先業儒彼鵠自矢賦成神助破荒伊始並影于飛穿  
楊符喜容州江陵四仕首尾廟食垂慶

叶平

光有前史

### 橫州公贊

公諱著小名友直睦州第三子貞元六年明經及第初

歸州巴東令次邕州經略推官終橫州刺史贊曰薛鳳  
騫騰荀龍天矯三仁系殷十德聞趙鳥齋宣靈白雀明  
兆及第聯芳前良聿紹符竹橫州俗是馴擾遠操孤風  
寓懷物表

韶州公贊

公諱薦睦州第四子貞元十二年侍郎陸贄下明經及  
第初衢州文學守郊社令歷北陽終韶州刺史贊曰鬱  
鬱北螺窪窪澄渚人物一時芝蘭玉樹懿懿韶陽春容

矩矱芥拾大魁文學掌故載令載刺身衢傑步沿秩賜  
緋位隆道素

通州公贊

公諱睦舊名思睦州第五子奏授滄景司馬賜緋魚袋  
除通州刺史贊曰烈烈通州松栢受命緋衣銀魚穆莊  
有敬為民作常執維申令由晉入閩纓簪輝映五百逾  
期於斯焉盛胥成而堅旋軫歸慶

邠州公贊

公諱蘊字夢復睦州第六子與兄藻歐陽詹讀書泉山  
貞元四年明經及第復舉賢良有天不厭直復生微臣  
之對辟蜀推官劉闢反公切諫闢怒欲殺之公曰危邦  
不入亂邦不居得死為幸闢陰戒僧人以刀磨其頸脅  
使屈公叱曰死即死我頸豈爾礪石耶貶攝唐昌尉闢  
敗還京說滄帥程權歸闕除水部員外郎拜邠州刺史  
知洪州唐書有傳贊曰明明我祖精忠卓識結志藏脩  
奎纏有奕賢良落對式是亭直抗義陳詞秋霜果日載

罹虎口刺史攸職幾若成仁智不可及傳紀儒林百祀  
廟食

循州公贊

公諱蒙舊名芄睦州第七子奏授孟陵主簿累遷金吾  
衛長史桐州刺史終循州刺史贊曰肅肅諸祖不競不  
絀勾稽匪懈樂是輯柔乃執金吾乃殿循州襲芳序迹  
良冶作求橫行獨步並有九侯東堂陵谷世遠名流

雷州公贊

公諱邁舊名萼睦州第八子明經及第初調循州興寧縣主簿累遷商州雷州刺史贊曰洵美我公執德弗回席庥承祚出穎掄魁興寧伊始嗣有商雷靖恭玄默以封以培政是靡忒萃渙激隤波餘後萌遺像興哀

福唐公贊

公諱旣睦州第九子睦州夫人鄭氏生端州江陵橫州韶州通州朝廷以莫侯陳氏有承繫之德主繼睦州封南安縣太君生邵州循州同州最後朱氏生公自號四



明處士初調京兆叅軍春秋博士累遷福唐刺史贊曰  
衍衍四明續授潛業園其醇源雲居有燈獎恬起落叅  
軍以徵博士嗣遷刺史是承謂難其八又終其九父子  
弟兄十烈並躋虎皮羊質畫脂鏤冰允揚其休式告來  
仍

福唐尉公贊

公諱攢字會通尊之子睦州之諸孫為福唐縣尉聞母  
病奔還母沒埏磚甃開坎室有白烏甘露之祥德宗詔

褒嘉立雙闕祀鄉賢祠唐書有傳贊曰謝故蘭王玄復  
其尤許國諸子夷簡維優憲憲九牧忠則邵州公公從  
子純孝作求荒廬口血木斷山秋白烏啞啞甘露油  
事聞旌命有燧斯邱滄桑物改雙闕時留

宗正寺簿公贊

公諱應成字汝大號矩軒宋兩請進士得之公之子嚴  
重平粹時復齋瓜山師事朱文公獨不懼師事二公公  
師事二公師友獨不懼又友其子四如循仰止規約續

講東湖得文公淵源之懿遂見卓識為一時道學推宗  
與子棟同登宋咸淳辛未張鎮孫榜進士攝官寧德以  
理裁事法折勢入臺幕獲上信友宋袁以宗正寺簿宣  
撫司機宜安退講道東湖之上一時名士多宗焉贊曰  
莆興道學艾軒始之復齋繼之復齋瓜山偕事文公公  
事二公獲聞文公咸淳之間父子進士不利于施乃見  
其志東湖講道戢景逃虛一時相推則有四如文公過  
吾家題曰門對小壺山樓接尊經閣四時趣興清萬代

詩書樂斷墨猶存相傳公逮事焉今考文公卒慶元庚  
申去公咸淳辛未登第尚六十年豈題述在公祖貢元  
父兩請時耶

同安公贊

公諱棟字用可號松湖矩軒公長子父子師事潘瓜山  
陳復齋講道東湖最後公又事黃獨不懼友四如與父  
同登咸淳辛未進士歷知同安縣事有廉直高古之聲  
慨宋社云屋托興迷途尋焦光舊隱之處講明道學以

淑諸人文公之澤注東湖而演迤以盛公父子達之也  
贊曰公事陳潘又事于黃父子師友金玉其章建水有  
泚日遠彌長潄之東湖臨視泱泱孰利于涉公也其航  
載邈之源載漱之芳有開道先永裔之慶

知州公贊

公字于高號慎齋松湖公仲子俊六世祖也文公講道  
東湖復齋瓜山傳其學公祖若父逮事焉四如與祖續  
東湖之講公偕伯兄教授于野又逮事焉傳介父弟山

長子泉同知子木父子兄弟四進士退而益脩文公之  
學型冶所就世林門文章世林筆位遇雖不逮關西而  
物品殆類公終瑞安州知州事狀遺失所附見與子木  
並廉名贊曰漢有荀陳宋有胡蔡建陽大成儒宗允賴  
紫氣停燭脉焉如帶孰引而長以濇以大業維經承巧  
乃瞋會三葉弗辰爰有遺愛綠槐誰庭久而未艾星流  
日翔碑板光怪

同知公贊

公諱以順字子木曲陶郡伯公仲子與伯氏玉井相師  
友以究心艾軒踐履之學續矩軒東湖仰止之傳以至  
治辛酉進士授海寧丞慶元浦江尹台州推官蔡蓬頭  
寇海上主者議招公爭不從棄其官去方國珎之燭遂  
不可已提舉江西時州郡多陷富州已危公署其篆以  
安既代州遂沒厯福清知州致同知福州總管府事授  
徒終身公忠誠不欺方謹奉其職官四十年故居不易  
一瓦衣麤食糲擇口然後言晚望靈光歸然于諸老凋

落之後過者考德陳有定欲清三路求贊畫于公辭以  
老以脫興兵禍洪武甲寅壽八十一而終祠在鄉賢孫  
曾起進士為廣東按察僉事卒不能棺世其廩云贊曰  
衍衍我公聯世其美考亭城山重規疊軌果德正行不  
我有已任獨于同為仆為起危以公存轉足失恃遺直  
高陽維坊及里清白維遺厥孫是似

縣尉公贊

公諱師傳復諱師說學脩字以父慎齋公蔭授將樂尉



改甌寧有平寇功再授仙遊進義副尉以沒鄉人方德  
至銘其墓曰祿不掩其德位不逮其才意其蘊厥美以  
昌後來其所以上承于世世者蓋未論也配方公嶠孫  
女孝而能慈力教子以承公志誌今闕附于譜與方誌  
者如此贊曰脩以世長用以時誥于後于前于作以述

### 三復公贊

公諱璫又諱圭信玉其字號信齋又號三復學者稱三  
復先生父諱師說進義副尉公篤自信講學窮理以上

續矩軒松湖慎齋子木東湖之傳薦明經為莆邑訓導  
轉寧國以教不及績復教莆郡寧國尋有薦者召問知  
出自公復教其邑以教諭應脩書召請老得賜冠帶致  
仕天性孝友元季兵亂活尊幼支門戶時堂從婚嫁而  
葬其父族七喪妻族四喪脩其祖祠與高曾而下祖墓  
從父家大疫藥疾殯死無忌畏路遇疾者挈共載或偕  
舍館而食一布袍四十年歸僅七金妻子每食粥二器  
乳子婦加半器正學道風為時推首凡六典文衡所指

授狀元環探花賜庶吉士慈郎中孟喬數十名輩皆其  
弟子有三世門下者慈既解首問所取浙解陳璘公曰  
渠密于汝會首果為璘得部使而下與往來莆者必候  
問起居以得一文為重巡視楊侍郎寧隅坐執弟子禮  
聽講中庸起拜曰某所未聞時年已望九所求文一夕  
而就猶燈下細書楊以為難壽九十祀在寧國與郡之  
鄉賢事具一統閩莆諸志所著三復集幾百卷十不存  
一悲夫贊曰龍起淮甸雲風景從卓彼鴻碩為世儒宗

藏聲處下一教始終完中粹行式其章縫維道其南維  
易其東徂徠明復我公是逢

處士公贊

公諱豫字崇德號德齋三復公叔子學于公退而質諸  
伯氏郡博與族人邑博克廣相麗澤以病疴不應辟命  
三復官雖久無力為遺公偕配方孺人盡易釵珥營斗  
室薄田以奉父母母喪明敕具美食時僅都憲一子方  
分及之怒曰吾母日短兒方稚食有時方媿謝喪葬禮

盡而哀恒過醇靜畏謹處家教子事事循矩度都憲偶  
觀慕斥不容見者累日貧而能仁稍餘即及族里鄉以  
為鉅人長德郡賓必致致必辭事問有質婉有所對一  
日別邑博聯桂坊宰里一少年前揖公問何往給曰府  
僉民兵即然亦三復郡博固在公茫如也家僅一飾酒  
器亟取賂免人以為笑抑吾家今日亦是基也墓在鳳  
凰西麓夢所授處贊曰懿懿處士守墨含章善用其拙  
晦焉自藏曰時幽憂方治靡遑物戕于明亦利于方居

以弗有言壽厥祥神告吉壤奕葉其光

敬齋公贊

公諱宗字存敬號敬齋德齋公子林自矩軒松湖于野  
慎齋玉井子木三復世以道學名公莊重古意而尤名  
經學遠邇及門往往策顯仕天官卿尹公旻尤顯者嘗  
發解首為忌者所落委以命不復試高督學超強之遂  
捷鄉科魁乙榜授寧海學正改蘄州致揚州教授以養  
老母以俊貴贈通議大夫都察院右副都御史正身率

物督士有常程材成風為之盛蘄祠之學主考山東王  
察使越尚浮藻公務以理勝榜稱得人親老無它兄弟  
二子一侍家一侍官率歲終一代其蒞官也寧海之歸  
無力北上揚歸始葺先祠故宇量周其三族晚得末疾  
孝敬不衰日數數省母母間不樂拳跼請過悅然後起  
祠墓之祭扶拜匍匐淚油油下岳閭老衆衆為郡守廉  
其貧助以河南關之地辭助棺酬以直為相壽邱祭之  
文有未老即歸事育罔遂徵此知學之與藩臬胡公榮

程公廷拱守王公弼累請祀鄉賢俊辭起征蜀也督學  
楊公子器姚公鏌檄郡與黃求我黃未軒宋立齋並祀  
鄉賢俊又書辭公意也亦矯雜也贊曰于泮之脊于鳳  
之趾一脉東湖言世孫子經學垂聞猶取淵委師嚴道  
尊名無虛士維祿逮親厥有繩軌歸雁轍涸言活升水  
為周為辭義適彼已後償于天考祥視履

菊庄公贊

公號菊庄朝諱以字元旭行教授贈都憲公仲子善誦



強記偉特而能厚敬齋官于外家有方氏大母與伯氏  
歲一更侍以弗竟垂成之學而責之于子夜分就息鷄  
再鳴起偕之所讀經書信口導誦不錯一字一句教諸  
孫亦然手抄時義論策殆千數篇性至孝與黃淑人事  
方共其常事間出新意以務投所懽方違和衣不解帶  
者累月事敬齋五鼓具盥櫛諸具導之升堂退復候之  
門為解衣帶視膳視文事視藥視寢非事事不離親側  
執喪盡哀處分遺曲致讓而厚于所後叔氏歲需之繼

聯姻族續家譜脩先祠與瀛州而下十餘墓增其祭田  
仰州祠力未逮以屬俊創焉青緋三十年再贈右副都  
御史壽望八以卒五子俊都臺右轄侃郡乘僖州守傳  
佐以義授階孫十四人達員外郎遇適遴適郡庠生贊  
曰維性習定粵有源本伊孝伊慈厥類有續蓼莪繫念  
恩日斯短既腴既虔節是涼暖居貞處順厥履坦坦退  
焉若藏執道日損收之簡穰言告持滿

陳永聲贊

無混而同無獨而異率惟化初守乃先遺逆客順遣羸  
取儉致進躡徒巧緩行曷躡後四體以長勤領一秋於  
間與水雲孤尚道焉隆而與隆墳典故心時乎至而亦  
至

見素集卷二十五

欽定四庫全書

見素集卷二十六

明 林俊 撰

祭文

蘄庠祠先祖敬齋教授

於赫吾祖嗣徽前聞金精玉潔石介蘭薰繪句摘詞蛟  
騰海立命鄉進秀青紫芥拾命與時仇僅弟子師枌櫨  
朶梢成室異施爍爍文光星流電激紀德祀賢靈祠孔

飾俊襲麻庇廉訪克貧矢心敢負白日青天真風聿懷  
浮榮載謝過奠一觴以告地下

鄉老祈雨

維弘治十二年歲在己未八月戊子朔越次日己丑鄉  
義等官并耆老等謹具酒果合誠懇禱于興化府風雲  
雷雨山川社稷城隍之神曰嗚呼前歲風拔木發屋去  
歲水溢頽垣人沒山崩沙壅田皆百餘年未有祇今中  
產之家上雨旁風無所為覆庇厥亦既酷矣今歲麥不

熟自夏至秋又復不雨禾稼焦死人無水可食災沴之  
後豈容有今而又甚者則非官不職則某等齒鄉人無  
以示風範用表頽俗天降之咎歟罰則奚諉然亦不謂  
更無一善者良者與蚩蠢無罪之細民無亦可憫歟天  
以生物為心神相天以成人以惠澤人以長王國世血  
食茲土者也即不某等存念無善者良者與無罪之細  
民留意耶今某等協誠循省革故而効新為郡眾請命  
以祈甘澍神其相天亟雨下土使垂盡之禾萬分一得

生民之望亦神之庥嗚呼厥亦惟神之責謹告

祭丁玉夫

嗚呼天降割吾玉夫其無既憐乎相古之儒弗罹凶禍  
蓋有之未有身若家是以烈也公無擇言無疎步忠純  
孝敬鎮外而粹中可以質天地而通神明其事天也至  
矣頓撼斥逐偃蹇艱屯若太阿之煨淬以益堅巨石屹  
然日炙雨潤而中無所入竟收用世之利其信之天亦  
極矣遠倖未幾三原居軸收之近郡再上提學公以易



洞訃解官服喪久之即家拜興國守又以母夫人訃解  
官服喪俛文毅居軸又即家拜南京儀曹郎未三月又  
起拜憲貳視學廣南方是時章蘭溪亦以僉臬委老二  
十有五年拔起祭酒盛事並聞善流生氣我聖天子崇  
儒右道于斯益光相臣弼成光大之業與文毅銓譽于  
斯益起嗚呼公器渾完涵養深以熟儒之効其大行於  
今無難也其詎知有是哉吾道誠衰而天者誠無意耶  
慈母抱愛子道仆而斃謂若是恻而故委之非人情然

則意外之虞天者亦不能周護而曲庇予獨過公信天之過也前舟先覆事已可知猶執我之定而諒天之必信前之勇曷若卻之之智也亦胡損胡負胡枉已而不為耶嗚呼其信天之過也氣息久盡冠襟自如其方寸不亂亦審矣非得之素能之乎嗚呼公之禍偶然邪抑亦有大關係者公同年中最少邂逅數語決知非近世人公亦盻盼及我普安之行抵足江舟宿留而別其後兩及公之門居益敝壞幾於不可入抑不知古之人桑

樞蓬戶環堵蕭然而絃歌屢空者於今何如也公之詣  
極蓋已聖學疆畛升諸儒之堂而窺其奧天假以壽草  
廬魯齋之室不足深也嗚呼今則亡矣秉彝人心郡有  
賢守固將謀公之喪而卹公之後況有吾邃庵豈直宗  
師東野之地而已哉生自弗卹胡後之思聽之天而已  
矣抑吾黨之賢之所自盡也予涕之從非公之私為天  
下慟而已溺者不弔吾能公乎已耶嗚呼哀哉尚饗

祭夏通政廷章

嗚呼昔公殖庵及我三人斯文氣義首尾一身我厠外  
臺殖庵內授公叅納言仍南之舊十年乖隔如參如商  
神交夢悟地短心長我廉湖憲寔公故里書不及私兩  
心如水我病得告公書猶勤朱墨帝筆歲致月分我起  
南臺公湘省墓諸子伯我溫存戀故公既來只臨昏過  
予握手交拜喜極而悲更燭話言不兩月許公進馬卿  
開寺江浦聲迹猶近我巡江西解官內艱重隔雲泥後  
不再年公轉通政孚人忌忘物殊價定岩廊林壑分局

而居邱烟水樹吾愛吾廬委重二公股肱心膂為國著  
龜為時霖雨蓋臣碩輔並武後先謂奄朝露乃厄中年  
公襲相器渾涵邃謹不激不隨叔度千頃有體有用有  
德有容有技若已玄齡之風夏自太師祿賜稠疊迨我  
清卿班聯寵接我公入仕廉取廣施家大口衆竟落難  
支貴而能貧短衣敝襖對客兩豆名曰學我我起韋布  
公世金緋各安限分緣學奚為今人古行亦孰如公自  
家刑國終始孝忠柳灣津橋月夕繾綣假山斷栢斯情

可見嗚呼自頃得訃尚無月日思公哭公我心千憶一字一泪落公斯文山號海泣風雨晝昏嗚呼哀哉尚饗

祭宋氏妹

維正德二年丁卯八月某日宋氏妹卒八日兄見素再以酒肉俛而奠之嗚呼哀哉分合萍寄幽明紙隔形蛻息隕彭殤奚擇父母生我凡八弟昆我老未死四弟偕存不幸促齡盡嬰諸妹吳方世早汝復斯背事好難牢境順易乖汝父汝兄特百茲懷咨爾令妹少安閨儀淑

閒靜晦善恐人知維昔壻孤性分于習汝動以誠波澄  
風息維昔宋初貲計涼薄汝重拮据粒累絲縮兩心二  
紀昕夕苦辛謂家僅起而病在身黽勉從事不藥不肉  
日支月撐竟守床褥察脉視形知汝病亟歸復汝父未  
敢言實事曷能隱死曷能作生者甚虞獨汝乎哭一子  
一女割裂兩孤孰是教語孰是携扶孰是摩撫以恤寒  
饑在目千感入門孔悲戚戚長風黯黯澹雲泡影幻夢  
予話曷聞存沒永違忍情斯莫神渙神遊吾母相見嗚

呼哀哉尚饗

祭黃叔登

嗚呼謂叔登玉立山勁年二十八病數日死耶予友汝父西溪善前二十有二年哭汝父京師視歛視棺予任焉孰謂今日又哭汝視歛視棺如汝父時也哀哉傷也汝父始病即以後事托我時謂西溪直方剛亮即不致有顯位不應年四十六死既竟死又謂宜厚償必叔登也叔登幼羸弱既長脩矐予私喜既又有子又私喜每



過予視其睛若定叩其命庚生於子四柱火過盛又運  
值寅卯丙丁歲又值焉謂若過重又私憂然予素不精  
二術謂不信也予出再歸汝狀貌豐偉酷如汝父又疑  
肥太早然謂西溪之後必昌無疑也前數日方拜我床  
下求汝母墓銘卜以是月終襄事予忙沓且病閔汝應  
汝使來致謝乃知有疾予往視謂宜多致醫汝則聞  
適若不經意不自意若是之奇再視則亟不可治傍徨  
告訣屬予與吾子達以後事出其母妻子羅拜斯時斯

狀可言哉可言哉哀哉傷也汝父死汝方七歲汝之死  
汝之子亦方七歲然汝父有父母兄弟妻又中年皆無  
可憾今汝無父母兄弟僅一老病之生母妻又年少雖  
素賢烈識字算其夫幾何汝之慘視爾父萬萬倍耳嗚  
呼哀哉天也黃氏世積德有何罪戾西溪素積德有何  
罪戾汝素醇謹有何罪戾即天之與佑豈宜戾罰又若  
是酷以慘耶斯神理之不可憑求之天而不可得然汝  
子決不凡汝妻有女丈人之風決能撫汝孤弱保汝家

不落無疑汝諸父諸兄諸姻友又皆可托孰肯負背汝  
予一日不死汝言一日存予將愧市道之交轉眼若不  
相識況有其子若孫者哉予言不信汝觀斯文嗚呼哀  
哉尚饗

祭白沙陳先生

晚學見素子林俊謹具肴醴托鄉友林君舜舉致祭于  
老友石翁陳先生有道之祠嗚呼先生澄澗開閩韻致  
極高自游康齋而心學正友一峰而節槩明友定山而

詩學又大進勾押烟霞陶寫風月堯夫之襟度識量高  
洪才慮深遠有道之風致而泰容懿醇軒特蘄絕則又  
叔度之雅與子陵之風焉先生非隱者也元亮八十日  
縣令晦翁四十日朝官先生蓋無一日焉處士名高而  
用多不副先生蓋未嘗試焉彭從吾首薦朱柳揚再薦  
不揆小子默致力其間然所以處先生者誠情耶翰林  
之授我憲宗之特見云耳木高風搖行高人毀然而攻  
洛者蜀人也先生則鄉人焉何心哉我孝宗恭默思賢

言者恒及焉而彼人方據要使清朝缺審像徵聘之盛  
舉彼人死先生老且病無復周公夢矣先生雖不用於  
時而道風義槩起鄉人而歆動天下廣之風所以大異  
於疇昔者誰之功天下之士稍知自立而不隨風以靡  
者又誰之力歟嗚呼東漢名節之士固亦有賴于此者  
况先生重非其儔即使游濂洛關閩得其微言與旨侶  
群哲會數聖以肩項四子無疑也某自京師幸親光霽  
慨歲月之永違而晤言之不可復再今已矣墓草幾綠

一觴未致托心語於便鴻寄世風於遠涕嗚呼哀哉浩  
沿南海嶽嶽厓山張陸儼在公神其間嗚呼哀哉尚饗  
祭檢討子道族丈

嗚呼期耄何人台鼎何位公兩失之亦又何義子博觀  
於儒碩孰如公其獨歸鼓晉鄙於同風挽蘓湖而並轡  
顧好脩以殞靈噫斯文之誠墜當成化之甲辰予詔獄  
之肇寘辱發憤以如狂挺獨力於時忌迨蒙原於左官  
忍割貧而腴遺秘臨分於贈言泪盈盈而把臂比署復

於留司歡騰躍以忘寐僕節使於南征勞尺書之遙致  
既之公以母憂卧廬予亦便道歸侍孚風抱於既知托  
話言於一戲篤久要於忘年領教墨於文字帳予行之  
若迷而公益醇以懿慙從吾以喪予暨介庵之謝事懷  
結惛以填膺遂毒疽而發背盖公赤心實人好賢出自  
視官如家憂國誠至在太學幾三十年而生徒迄無異  
議風憲之秩預推翰苑之員外置緬入覲於天顏勞二  
詩之先詒出細語於隱憂分半榻于旅寄羌余解紱迴

輅公亦浩然歸志勤遠緘以告期胡一疾而遽弗治負  
宿諾於經邱竟訣言於遺志嗟絕命於終天恫淪精於  
下地盼丹旌於陸離幾失聲於哭次頽玉樹於孔傷恒  
遺音於弗嗣泄予衷之糾纏固非在夫椒糈與酒載鳴  
呼哀哉尚饗

祭黃耒軒

嗚呼耒軒胡不百年鍾發淑異茲山茲川德宇春融文  
局爾雅懿躅詞垣物厨器冶悽誠中慣有直如弦買燈



疏入湘水南遷既決而環憲廟仁聖復官留臺徐引而  
近平反績茂右秩明揚公病遂告振衣層岡孝廟嗣服  
起僉臬憲風紀士範副聞愜見脂韋叔尚任獨無同硯  
硯舐裂樹高多風公賦歸來渚雲溪雨猶勤述作手筆  
燕許邁邁時運閒身隱憂少陵龍川公也其儔白社衣  
冠典刑諸老遊息縷斷烟休迹掃疎松短髮晤語無期  
俛仰疇昔隕越斯悲嗚呼哀哉尚饗

祭鄭司徒東園

嗚呼維嶽字靈終鮮斯具維才用世終鮮斯遇公邑專  
秀在郡特隆如氣四備而日方中雲漢為章月流星發  
侯儒侯吏駿聲秩秩昔在英宗又在憲宗又在孝宗奇  
收顯叙百十臣同職勞弗來立孤樹敵青蠅容點吠聲  
以寂麟鳳維侶魚鳥移神連疏十九以乞斯身帝篤表  
著鏡誠命可晉秩畀傳優我元老皇上嗣服覃恩林樊  
麟衣玉帶海國僅觀膺膺廣原下有雲水樂胥視後有  
踵芳美不杖不藥重致我詩居然謂訣三復而疑不遠

登堂公步而出把臂入內引觀飲服踈燈細雨坐話移  
時收屬元化曾是惜之氣完際盛福壽考終後先鄉哲  
繫孰為同俊忝新媿相知皓首隕獲斯文豆炙盃酒嗚  
呼哀哉尚饗

祭廖約齋憲副

嗚呼惟公質木近道重厚少文山藏海納涇渭中分獨  
醒皆醉孤妍群醜不相為謀為敵已久口吹面借有為  
有真謂必公異則知其人公握刑章中外二紀直方子

良名無虛士肅肅外臺上有殊階長空鳥倦公賦歸來  
疎菊長松閒雲野水謂樂無憂乃甚在伍典刑斯謝公  
不百年青峰吊鶴古樹寒烟社不尋盟墓不視穴素車  
夢臨斯情隕越嗚呼哀哉尚饗

祭蘓守林師名

嗚呼辛丑之歲識子釋褐問姓情投水支木末子令吾  
莆亟以憂去頌聲流聞家人婦女後二十載如參如商  
姑蘇邂逅話短心長我厭奔驟泉石自老德音南來聽

之愈好我有愛弟教事治屬謬荷特推謂傳家學凡今  
市道紆仄險艱奚敢獨信元季異觀子有素抱不亟不  
徐謂宜致遠以疾其驅在辰歲厄庚子日斜期不予副  
飲恨長嗟才高命躋由古多然臨風閣泪忍默奚言嗚  
呼哀哉尚饗

謝晴

二氣良能幽明表裏休咎由人和薰乖致兵烈猶火陰  
慘寔深神抱湮鬱雲淒雨靈師老絕儲負茲怏怏豈曰

一念有應如響神寔念民恫瘝若身贊厥獮薶用宣聖  
仁祥風發發秋日杲杲天宇開張翳迹如掃體薦壇下  
有報有祈一晴之借寇盡為期尚饗

祭楊月湖父

嗚呼洛陽紫陽識者皆推論其大中韋齋之世有吾月  
湖其有所受也公置身繩柙能鉅而養充方殿大郡賢  
問秩秩然以起即理柴桑公之迹固不在督郵而鎮雅  
訓恬身任焉老成持重典刑鄉國者幾三十年孝友肅

睦伊誰之型範退讓恂恂伊誰之風致公之德福取左  
券不遺矣重我月湖潛默領悟上友千古固將演洛閩  
之傳所以立長世于公者又將不直身世耄期之壽而  
已也俊辱月湖道義友益慨形逃而迹謝比公訃而始  
知王事程期宵日斯征俚文叙哀有百斯情嗚呼哀哉  
尚饗

祭教授祖生祠

維正德庚午二月二十有二日戊申孝孫俊重過蘄陽

謹具牲醴祭告于吾祖致仕教授敬齋先生之祠曰嗚呼祖與孫固相屬也俗韻寡諧世關長謝莆去蘄三千有餘里一尊祠下徒有其夢亦何有以親致之今耶方青邱而縱浪忽黃紙以到門付孫以金革之事不敢不起也西川吾邵州祖抗劉闢之地今之事任又重不同者孫其敢不自盡耶分上憂揚先烈載歸我林樊祖其相只謹告

為官兵疫禱



正德五年歲在庚午越四月朔日行軍都察院右副都  
御史林謹具牲酒致祭于撫內風雲雷雨山川社稷城  
隍之神曰賞罰大柄禍福大防幽明翊運綱紀一方潢  
池弄兵東川騷驛吏冒民痼繫神攸責既慘而熾上厪  
宸憂陳師鞠旅誓殲乃讐如虎如貔我兵赳赳一鼓成  
擒摧枯拉朽犬羊禡魄烽埃餘紅距躍戡亂式奏膚公  
戰血猶腥重罹酷疫毒穢薰蒸僵尸枕藉遊魂斷息哀  
此健兒秦越繫戀寧神弗思我藥我厝我憂若禱惟神

悔禍機幹元造祥風先驅凍雨洒塵瘳蘓仆起勃勃為  
春薦芳陳詞于役請命揚休宣靈神先時慶尚饗

祭病死征夫

行軍都御史林遣酉陽頭自李庠與病故從征士兵酒  
肉告之曰藍賊搆難干紀亂常汝役征事我武用張方  
切汝念乃疫而亡魄安淺土魂返故鄉有酒有俎亦有  
佳梁嗚呼其來饗

巴縣祈雨

紅巾扇禍干紀亂常奉命于征遠蒞茲土燎原之燭雖  
稍戢於曩時而乞降依違掠食者雜出載議撫剿以仰  
副明詔維時官兵四集營壘萬竈疫厲易作況雨澤告  
愆恐有秋無望巴人喧騰謂麥盡于盜尚倚秋穫奚生  
弗辰于旱斯酷夫盜與疫與旱皆病民者而神固聞知  
無過耶先王之典能禦災捍患有功德於民者祀祀祐民  
也今民病於盜病於疫又病於旱是雖官吏貪殘俗薄  
惡刑政罔協于中者之咎神無與有責耶神其庇國右

民相厥戎事，魁元兇之鑒，而禱其魄，俾降者並生，否則盡戮，無噍類。廓清厲鬼，俾我軍皆勿藥，驅逐豐隆，需膏澤，紓焦枯於數千百里外，俾困庾穰穰，流離蘓復神之，庶某亦分有餘責。謹告。

謝雨

俗落政厖，神理弗右。既盜既旱，天速之咎。流離窘迫，民斯為極。笑內罔定志，而外罔定居。非殍則盜，不可以已矣。待罪西征，技窮當局，鞠躬秉虔，祇告壇下。越二日雨。

信宿又雨苗復蘓兵亦尋有凱報慰望伊始畢功允期神之庥亦予小子之祝其臨饗

祭吳僉事景

生死大分節義大閑孰是不朽天地之間嵇血巖頭張  
齒顏舌日星亭亭于茲永烈陸馬蜀川盜誰禍始通巴  
尚闕江津猝起子抱奇氣雪恥除兇躍馬按劍萬夫之  
雄倒海狂瀾一柱奚力卒潰城陷手刃三賊銛鋒雨至  
以身代民言訣老母黑風酸辛子孝且仁子忠甚武亡

以永存掀揭千古嗚呼哀哉尚饗

祭汪洋指揮陣亡

天降亂于三川東而北則藍東而南則又曹螳臂當轍  
魚遊釜而假息固已寘肉于机矣爾壯且武奮而從征  
嘗屢殪魁酋搗巢穴以顯樹有勲績予時惟汝之奇汝  
亦副知遇以仰答世恩矣江津馬鞍之戰辛未正月二  
日也執訊獲醜破其營擒戮百九十有餘級亦良偉矣  
乘銳而深以逢其伏而汝以戰死過進矣然視彼懦夫

奉頭鼠竄生如汝死耶嗚呼天厭亂宜有期生死大分  
抑斯汝武官之所耶有餘榮矣殮汝棺汝謀汝葬之事  
而祭以文鑒之其來饗

達縣謝雨

天厭禍兩川風雨時若而歲以稔告元凶悉擒亂用弭  
亦幾于盡矣惟茲七月亢陽縱熯土毛如焚居室若甑  
熱征戍暘以道死謹齋沐省循走過壇下是日申大雨  
酉雨亥又大雨至于明日長風扇煩去潦流惡枯回而

病起天宇澄肅川嶽於是乎改觀矣某數小子敢貪天功神相天惠民偶值之也薦馨選肥仰答神貺惟是殘醜猶漏天誅蠶尾蝮牙上千宸慮神其懋揚英武盪殪妖類亟贊膚公閔綏我元元某尚脩有報事尚饗


祭魏少司寇仲禮

昔在留臺三司並峙公重如山其門如水跡孤寡合君子無朋帝曰惟臣作朕股肱入少司寇實便騰翥有躋若逢遽賦歸去連絡黨禍弗震弗驚人曰神螭既哲且



明望八委運壽亦孔多落落故老傷如之何嗚呼哀哉

尚饗



見素集卷二十六

欽定四庫全書

集部

見素集卷二十七

詳校官中書臣賈鏌

中書臣劉源溥覆勘

覆校官中書臣汪學金

校對官助教臣蔡鎮

謄錄監生臣胡曉春

欽定四庫全書

見素集卷二十七

明 林俊 撰

祭文

一 祭始祖邵州刺史祝文

維正德八年歲在癸酉九月丙寅朔越十有七日壬午  
三十二世孫都察院右都御史俊承祖父先都御史宗  
先都御史朝之志構我始祖唐忠臣邵州刺史十九府

君之祠中祀公配我始祖妣何氏祔以二評事六宣義  
十四奉議二十七評事四府君昭穆之位系我五六居  
士而下四房宗先官序名配以萃渙棲靈是日謹具牲  
帛酒饌奉安神主曰公起人文連興破荒稜稜義聲連  
幹綱常群翳衆啾星鳳快覩世始君臣閭始鄒魯儒林  
事述首錄特書鳳崗千仞生氣凜如讓舍軍庠祠亦並  
去墨食孔艱俎豆何處逝波歲月心久力難景光流射  
星斗夜寒奕奕新廟神用吉告應會舉曠畢情祖考新

廟既落奉安公神式時瞻對于祀于裡既多受祉祇續  
維似維德維文維公孫子尚饗

遣祭從征指揮王英

落落難合孰晦而章之溷溷為同孰怯而勇之野宿火  
次孰神而歸之師捷身死孰速而奪之伏枕啓衾孰藥  
而殯之旅襯孤魂孰檄而返之生念汝勞死惠汝酒食  
汝受而歆之尚饗

祭始祖唐忠臣邵州刺史祝文

惟公文炳日星忠貫金石鄒魯東南開先永式祀有鄉  
賢傳有國史重此雲仍敢稽報事茲惟冬至謹以牲爵  
庶羞庸申祇薦以二評事六宣義十四奉議二十七評  
事暨林氏宗先祔食尚饗

祭豫齋中丞

粵在京師二黃三林兩姓兄弟五友一心公在班行儀  
觀都偉尺寸殿庭萬目騷騷秀朗清發玉色金聲溫恭  
慎密德宇天成虎口餘生魚頭舊直受知累朝進陟雄

職三省經略胸中甲兵綏撫鎮定居然長城繩墨糾違  
賢聲章播方引入近而以病告悼念昔遊晨星落落猶  
陪杖屨風泉雲壑收靈川嶽人琴俱亡拊膺割裂世道  
伊傷公同邵州院街並峙堅壯先淪朽裂何恃楚楚蘭  
玉先後嗣芳公世之短公澤之長紫峰練辰轡紉云發  
觴酒寫勤以告長訣嗚呼哀哉尚饗

祭儲殖庵少宰

嗚呼元醇應會奇碩命世譬之麟鳳有不一二嗟嗟殖



庵粹德完名述作備體斯文典刑公始自玉視我它山  
不決旬月駕不可攀葩藻天成一機萬有細入毫毛匠  
哲袖手光怪騰發猶驚鬼神前驅韋柳賈馬後塵情話  
綢繆我心我腹意往形忘不隔骨髓涼雨疎燈柳灣抵  
足言願孟韓雲龍相逐嶽嶽士望為瞻兩京由公屈伸  
人卜太平二十七年中間一面別易會難光景流電日  
者橫禍士夫載罹孰謂狡童吾汝亦知三尺神明人理  
可信公老尤奇壁立萬仞海隅天上言念衰殘風雨酸

切廢寢輟餐小大俱年物歸于盡木折山頽文昌夜墮  
南來凶問不有月日且哭且疑謂虛謂實嗚呼殖庵其  
已矣夫一短兮萬長具完兮獨缺後蓋壞兮常留不物  
腐兮烟滅杳杳兮夢尋絕四海兮誰知音素車白馬兮  
山遙水深寄一樽與萬恨兮月黑晝沉風淒冷兮泪盈  
襟嗚呼殖庵言長而意未盡如吾友何哉嗚呼哀哉尚  
饗

祭鄭元美郡丞

曰昔先公及公不鄙數世室比分投姻連友契讐經軌  
物若有符違論難開解與道為歸敝帚千金楚和缺遇  
銳鈍易酬我乃非據丞叅三郡有鴻厥聲孰宣其滯而  
沮其成訪落起廢曰有後命出雲無心柴桑再請深山  
窮谷霞赤雨斑有要仙流烟水之間公病踰載不涉床  
褥危論豪談抵掌頓足日者存問頗覺衰羸留情藥物  
以杖自隨天地一寄生滅彈指物始必終彭喬何恃龜  
傳組襲有子有孫斯懷永割脫垢離氛有訣斯文聲吞

淚漬觴豆馨冽以飲以食嗚呼哀哉尚饗

祭困庵

嗚呼困庵子之學可遠至才可大施而器可以顯受其  
皆不然意者將優之以山水之福收桑榆而壽金石其  
又不然吾不知其指也子一門父子兄弟伯姪駢首青  
緋中丞大顯其後仍襲中外又顯地美者力分水支折  
多而流弗盡駛物理人事意者其然歟子與子兄弟自  
同筆硯及今五十年道相師而意獨至中丞世早猶子

足恃予簡出歲不數東東必及子之門子來南亦復過  
我遶幽搜勝遡高寒而臨遠碧非子不樂也雲庄寄傲  
子多以疾辭弗赴子謂子自愛太殷然體果重行步果  
難年後予而先老子戲曰子熟矣蓋箴之也嗚呼孰謂  
其止是耶子始病弗及知有告者曰誠病誠病子亟視  
則証已亟又視又亟至竟弗治嗚呼子嫁娶俱畢孫亦  
長子無欠事予懸寄兩幼子猶未抱孫予之所短子之  
所長子目可以瞑可以無悲矣為子之故廢寢輟餐泪

油油落枕上子兄弟俱去予其益孤矣竟之何哉一樽  
子別飲不飲未可知而臂不可把言笑不可聞所見者  
僅帟上之容兒孫之踊之哭之哀而已嗚呼痛矣尚饗

祭抱獨郭先生

嗚呼渾朴既散佻巧奚觀吁嗟先生削偽反初文成在  
中玄壁紫貝獨月晴峰蕭散物外知白守黑近不偏同  
舞雩觴詠有點之風詞譜藝林微言雅調意觸神迎會  
玄領要散殊有象肢臂猶身百蠶一葉官久而貧棲鳥

舊林搜奇選勝星霜十移一疾以盡亭育禪代委心奚  
疑老成之逝世道之悲吁嗟先生鄉國輕重白日晝冥  
鬼驕狐縱某賤兄弟少及師門以督以教開蒙指昏浮  
窳翔酬不龜澣紉及尾師還叨陪几杖雅俗獨鎮猶叅  
典刑白首相失仰天失聲嗚呼紙上今丰神夢中今言  
笑長暮兮何晨猿霜號兮鶴夜叫嗚呼哀哉尚饗

祭黃大叅伯望

嗚呼士貴乎真學貴識臨事貴斷才貴實用而操之有

常世道胥賴焉子重厚少文沉永內定脂詞蠟貌無有也精警識治絕浮瑣論難徐折一言肯綮開脫臨人出政守軌則以終身如善藥然利去病堅木優於任載自計曹及守及叅大政華問播流肇盜區也至則歛戢承其後無及焉武昌數月茂著廉平所見無及焉廣藩風宣惠溢所聞又無及焉右轄累推固將有大受僅以往者之形吠猶騰厥聲白日青天其誰則信之而決策東邁以從我雲庄子之道則然也孰謂抵潮而病以卒耶



嗚呼子之力可當大事可一面可許友以死鄉國子畏  
三數人間耳其竟是耶薄田僅足口食老屋低短風雨  
未足庇吾流物品容蓋棺定耶睹睹猶童翁翁猶賤子  
自有至者亦奚賴彼哉嗚呼易庵子無復子一臂矣孰  
重予之哀之甚也世道慟而已矣白日兮晝沉仰天兮  
失聲靈風先驅兮凍雨灑塵魂來兮母驚對兩孤兮餘  
情嗚呼哀哉尚饗

祭楊石齋乃尊

嗚呼川嶽完醇有厚有清有與其一亦足自名如閭四  
陳如井四李如眉三蘓鄉國並峙文聲道望曠視無前  
公舉赤幟凝然中堅公起甲科子已先第狀首解魁嗣  
無虛歲伯氏元弼仲氏上卿謝蘭竇桂階祀前盈少師  
太師麟袍玉帶錦水掄鄉陶然物外顯允石齋作時阿  
衡運猶開德佐理太平帝念師臣是父是子內法大官  
几杖之賜自公之疾疏輒論思帝曰第行朕以醫隨自  
公訃聞當宁悼惜曰惟舊學朕不汝釋血誠披瀝竟動

宸衷弼亮孝理而以奔從卿護其行朝速其訃存沒有  
耀殊恩異數關西載德有業有年以植以溉蔚焉叅天  
嗚呼公之責償造物其厚其清其固如是哉某辱橋梓連棗  
並登通家情義豈曰友朋于役西川言念傾寫臂未及  
交酬我青野會合斯難萍水餘臆設位緘詞斯夕何夕  
嗚呼哀哉尚饗

祭東所

嗚呼東所命也夫孰安其處孰異其行胡赴胡謝以止

以鳴荅搜尤於殊遇副遂初之素盟還蒔松於陶徑曾  
染指於鄭羹兩楹之夢竟訣斯生嗚呼公壯而武公亮  
而清學惟自得性乃天成稜稜直氣炯炯元精寧還區  
而窘步甘邱壑以陶情嗣音一老樹幟群英方將侶鷺  
湖而訪嶽麓招栗里而吊屈平分嚴陵之席而抗堯夫  
之衡彼鸛翼螳臂蚩聲螢爝曷足繫其重輕而死生之  
際乃若宿計而預營名無虛士信矣夫俊幸及公未交  
一臂感一氣之相投辱尺書於數致詩篇和荅千里郵

置不腆之文又辱公序假歲月於星纏合衆辰於一奠  
嗚呼伐木絕響白頭如新孤懷遠韻乃復吾珍忽來凶  
問月久乃真山頽木折物脆人陳嘅屋梁於落月寄一  
想於丰神窮天之翰截海之鱗附文一奠有涕盈巾嗚  
呼東所竟不及見矣其何情嗚呼哀哉尚饗

祭太師涯翁李文正公

正德丙子冬之月吾師涯翁文正公李先生計至俊為  
位雲庄以哭訃再至又連哭附小奠我師先生之靈曰

嗚呼我國家河洛効靈人文啓聖鉅儒宿學高詞大策  
步典墳而追風雅固已岡連峰出矣巍然而特起者洪  
武時則潛溪翁永樂而後則楊文貞公成化及今文之  
盛又極矣吾師文正公又特起其時渾厚紆徐無刻深  
峭絕之態而油然其光蒼然其色抑揚正變如迴風立  
海倏焉砥平良將勍敵優游而暇豫又如長江大河瀉  
之不盈丈之千百派無見其縮先生於文蓋深矣書兼  
六體真行草篆點畫韻致宗秦晉而叅以獨得之妙先

生之於藝亦精以習矣粹衷完質離垢而絕瑕含洪邃  
永居以益晦歛焉其若無先生於道德蓋亦純以備矣  
少以神童宣入宮荷有殊錫弱冠第甲科不出館職者  
五十年在宥密者二十餘年陟元樞預顧命既致其政  
猶給祿終其身歲時勞問訃上輟視朝卹恩加于數等  
先生之遇奇且極哀榮且至矣仁焉春義焉秋生生落  
落而莫知誰之為經猷注措顏之所謂大勇者也俊承  
誤收迹疏心往僅侍先生者數四丙辰入覲先生曰見

素太迂吾師生何嫌脩一刺門下以去先生時遺俊書  
無敢荅解元柄詩來我雲庄謹和付達子來上先生語  
哽揮泪者一再始及成禮嗣是和篇往還達還先生出  
詩三十首命和和上先生病且甚猶命扶強讀泪油油  
曰平生見素知己詩其永訣矣嗚呼謂俊之倨簡荷先  
生知愛之深如是耶其忍聞其忍言一尊附奠涕與神  
來心長語塞其惡足寄耶嗚呼其已矣尚饗

祭大司馬劉東山



曰聖作物覩雲風景從憲廟出震我公是逢首讀中秘  
載署司馬物品一時有風斯下同升意屬懇以驟辭出  
叅大政乃正藩司懿懿中丞經紀河決奔流為馴宣防  
獎烈司徒陟佐引疾祈哀孝廟遂公箕頰初懷鷗石猶  
涼薦書聯絡帝曰汝行殿我南服三邊震蕩特付本兵  
溫國入內人卜泰平孝廟勵精圖惟化理寄任老成朝  
多君子魚水之會一日三宣股肱心腹禮絕隨肩孝廟  
升遐公慟幾殞力乞遺骸東山待盡蟲妖鬼熒水簸岡

燔烟燄漲黑白晝為昏坎止流行徐值其定翳收日明  
天子仁聖公既西下我亦東還過從一宿別泪斑斑青  
野回翔交情滿帟床褥何時竟乃罷市繫人無祿喪我  
宗臣謂誠可贖言百其身一日公存一日元氣未折山  
頽世風委地嗚呼木落兮山秋悵跡孤兮誰留蛇蟠兮  
鳥叫下夕陽兮江悠悠嗚呼哀哉尚饗

祭陳如賓孝廉

正德丙子臘月之望之既見素子林俊之友陳孝廉如

賓卒哭之哀而過焉積五日始強成文具酒饌率弟姪  
若子哭而奠之曰嗚呼昔賢命世未嘗不推之於天吾  
於如賓即未謂河嶽完靈要亦東南元氣至清之會矣  
造養深純持行嚴苦斗室危坐以靜見天地之心古聖  
賢之氣象而澄若止水重若喬嶽盎若春陽若冰雪之  
芳潔孤風遠操為世道甚賴昔伊川門人竟無能傳其  
學子遊白沙旬日爾爾矣而酷信不移其敏若不逮其  
堅苦又殆若過之不規規文字述作以濫附四儒之傳

然使生夫子時得夫子為之依歸當列再閔之次其尊  
德性其子靜下耶棄官為養一十有三年母疾亦疾逝  
而亦竟以逝其純孝矣夫無他兄弟一弱息不假五十  
八竟終斯子之至完獨欠至厚而亦以薄斯天也易簣  
無一新衣官為具棺予為之具殮疏戚賤良遠邇下及  
穉弱與其女婦識不識無不為之酸痛天日為慘黑子  
之道足信矣子謬兄事我每過我群疑開解宿疾頓脫  
以去子其我著蔡我藥石矣餘日末路由今其復有子

耶叔風盡滴猶幸子立赤幟指揮群迷抗顏流之一柱  
由今其不復可支矣嗚呼吾世道慟也哭吾私而已哉  
尚饗

祭困齋

嗚呼先生方格邃猶峻聲鏗韻上風長征九宇一瞬決  
起榻翅竟落誰收雲居水眠天脫籠囚閒福伊穰脩景  
奄促賁是長餘優其後贖輜車晨啓並玉香山玄堂漫  
漫大化公還嗚呼哀哉尚饗

祭楊志仁少司寇

惟公儲祥越水載德關西三書並起二使與齊掀揭高  
竒早收遇晚言階落郡一斥誰挽拔尤宣滯連亞上卿  
基有後命乃虧其成昔在同官吾汝方格其間猷為不  
爽一墨嗚呼公已矣夫文懿在天公侍而遊下土茫茫  
木斷山秋嗚呼哀哉尚饗

祭周翠渠

維公卓識偉才人豪天挺孰取記聞曰有要領資深輔

博靈簡陳編靜思瞑索以日以年畜久而泓出有餘用  
海立星回文得機綜若昔前聞艾軒後村超契終詣有  
本有文兩翁桓桓勇絕誰繼公鼓而前振汎揚厲文詞  
詭說由意折衷奇正互出壯夫之雄烏倦雲還脫屣一  
面猶取校讐皓首筆硯白雲誰和誤引同聲相逐雲龍  
四方以征昨歲之夕歸休有夢豈曰其然斯文之痛茲  
夏之孟壺山其頽鄉國共疑繫公其歸嗚呼公可謂全  
矣謂命維八謂壽維九謂學有後承委盡胡有嗚呼哀

哉尚饗

祭澹軒弟

正德戊寅八月十九吾弟澹軒待學既晚食頃而卒中  
證甚奇及亥氣絕嗚呼痛裂矣前一日約汝雲庄自隨  
辭夜四鼓報至亟回比中道得訃嗚呼痛裂矣六十年  
兄弟幽明俄頃入門浴櫛易衣矣嗚呼痛裂矣前六月  
待受死今汝又死二兄一弟能久存耶嗚呼痛裂矣汝  
未有子猶幸有遺腹意天之意也予立遵為汝後以主



汝喪汝子生與遊兄弟相依以立忍淚為文與三兄五弟諸姪設奠與汝長別嗚呼已矣夫痛裂矣汝有至性順事吾父兄家之蠱皆汝獨任義之舉皆汝相成焉出入深林長谷觸突猛噬無苦也渾永鄭定遇事若宿構徐出一言而決斷不失和處疎戚賤良有恩意樸約寡與成有家公府無汝之面人不知吾弟也要門子姓無復賢汝者惟嗣事循襲未即如教有此倉卒然汝兄在可瞑目矣嗚呼痛裂矣我望汝送我顧送汝耶意長言

短心腸如割不可以書矣嗚呼是訣矣痛裂矣饗之哉

祭山齋母林太安人

維靈柔嘉維則幾頴內含言歸蒲坂于水之南儷德食  
貧城是三徙力不遺餘健夫是似二雛孕淑叔也麟皇  
門戶有赫不顯其光卽銜使秩封章詔命望九真還目  
酬心應某忝令子徐郭心期生芻一奠黑風辛悲嗚呼  
哀哉尚饗

祭張羅峰都憲

惟公渾完內植晶彩外彰蚤收甲第遂試星郎隱發機  
授事若宿構崇城言言邑險誰右牙衣象簡攬轡澄清  
提封千里于我溫陵尹寺移權解綬東去木高風搖旣  
乃終遇明州載守聲烈無前大叅斯擢中丞繼遷南征  
壯猷召虎是似奏膚三錫天子之賜東南財賦經度自  
公利孔搜剔乃陳乃紅帝曰勞臣若金汝礪宸注垂勤  
一疾短世交遊氣義千里如期設位緘辭倍昔以悲鳴  
呼哀哉尚饗

祭方與義

老友見素林謹因族子有祿郡丞之便附祭于故友瓊  
郡郡伯桐城方公之靈曰嗚呼維公神清鬯朗穎厚所  
鍾柔彼金石角其蛟龍釁起言階黨人斯籍帝諒貞臣  
竟薄其責尋尹劇邑載刺大州聲先實副風宣惠流帝  
曰珠崖汝其予守小決大聞無取牽掇冰寒玉潔晨夜  
在公擾馴訓教仁及兒童乃服誰舍乃春斯輟陸絕水  
斷斯月何月素車繫戀言赴無期一尊既奠老泪交頤

嗚呼哀哉尚饗

祭泉山翁

惟公道槩裕穆機神淵穎一落其芒不有畦畛詞林養  
望粹質完聲青宮柄受司成二卿乃長銓衡乃司留鑰  
豈曰北門自陝之托四星踰次貝錦聿興于樊于榛于  
彼青蠅天開日明言諒忠懷峻秩其還寘飛奚慕瀛濱  
風月杜曲桑麻皓首述作其書滿家筭出蘭立甲科四  
世青緋繞環膝無餘地貞松古栢秋水精神考德問政

晝乏停賓復席繼燭言歌擊缶聯絡絨題猶筆無荀川  
岳淑厚繫公其專穹階上壽福極無前山立依然斗瞻  
非故惻雨鬱雲素車往路臨文飲泣迸涕交頤夷清惠  
和世風則醕鳴呼哀哉尚饗

祭楊都憲母

惟靈玉雪其質金石之精柔儀正色體素含貞梅實未  
仁鸞影孤照遺娠茫茫形影相吊凱風寒泉有美共姜  
于彼柏舟于建之陽惟時艱貞神理所右任咸之妻永

叔之母天壽奇節篤生大夫續戎元弼嶽降之符晉國  
出總贛君徵入母殯在堂斯夕何夕曰有命典曰有卹  
章兩璧斯合玄扃世長子烏啞啞寒猿幽咽青霜長松  
千古斯烈嗚呼哀哉尚饗

祭鄭直甫

正德庚辰四月乙丑歸司徒主敬姻友鄭君方湖之櫬  
予走吊已邇游仙溪矣不及撫棺以哭憐視其未晬幼  
孤悵然自失亦悲以疾矣八日癸酉乃強成文遣子適

詣几筵職其奠事告之曰嗚呼屏山在仙寔惟崑崙乘  
時應會乃生東園維岳其神維帝其祉為漢上卿為周  
內史隆遇躋極方湖載光是父是子于興破荒亮質閨  
性霽儀豁度鵬鸞風塵驛騶道路材高晚售首白猶郎  
盤錯開解發硃干將物化循環完福斯忌田荆一姜競  
與二惠介也又弱慘慄奚堪日斜鵬舍輜車載南山有  
遺鍾善有遺積後之歲年梧竹森立走吊相失老泪如  
傾一尊遣奠特百常情嗚呼哀哉尚饗



祭章楓山

卷二十七

嘉靖紀年二月又十日丁酉見素子過我老友楓山翁  
先生之門哭而告曰嗚呼道有界畛時有機繚鳳衰麟  
踣飛走吟弄居醇守樸吾道不孤柴桑方格易洞門徒  
一代完人兩間正氣立懦廉頑大雅風味白首時化彷徨  
艱貞言屬世責

當奸人構亂公對人  
設許某可時寄聲焉

幸遇聖明存問

疊稠斯生斯日既老既病收焉以寂歲陰殘燭弱子拜  
前寒落可念悠悠蒼天昔也何來今也如夢一老不慙

遺典刑之慟

祭孫德成宗伯

正德己卯六月寧庶人叛江西都御史孫公一川死之  
七月寧擒又明年新天子嘉靖更元贈資德大夫正治  
上卿禮部尚書賜葬祭錄其二子祀之洪城友人見素  
子林俊道杭具香帛酒饌遥祭焉嗚呼自古亂賊之雄  
盜竊神器必陰嫉所不可制之人故始為緩謀中為種  
禍而終則甘心焉意恃此以風驅雷迅鼓之而無前曾

不知鬼禍其盈天助者順徒足激忠憤壯剛志使我衆如虎彼賊如鼠喪首敍氣滅其無日矣賊既賊公容知擒賊以償公者固公鄉人耶斯天意也公神不死萬古一公而賊灰逗揚使販兒弱子唾轆車而甘賊肉者所至如市一再歲正典刑焉死顧公榮敗亦無賊之辱矣方是時旣賊之餌右賊以遏公秦緩賊之討以貿易神器者生如公死耶聖人出世公烈益彰所以贈公葬公祭公祀公而錄公之後者薦及嗣至諡亦尋舉焉俊猷

義公同首觸賊怒天幸卒不死而公死焉斯所以義公  
慟公言切意詳歲月遷改于斯斯冀其有待矣嗚呼哀  
矣哉尚饗

見素集卷二十七

欽定四庫全書

見素集卷二十八

明 林俊 撰

題跋 雜著

跋存齋稿後

予嘗恠賈生王通李觀諸賢不及見其至有私恨焉天地間不賢者何限賢者顧天以死謂天誠無意是人其未可知也今觀進士王公彥恭有感矣公在諸生以氣

節勲業自効詩古文駸駸出聲震業光名流推讓假  
之壽其轟烈俊偉與世相無窮無疑也而僅與顏齊壽  
幾于郊之窮得一第而不沾一命又弗逮乎詹以死然  
其道已信于友售于時其遺稿已克傳于家其孫啓已  
世先業有古行為名御史嗚呼古今人壽者何限荒榛  
斷莽漸盡而無餘者亦多矣其諸為壽不在天不夭也

題五賢遺像

予從二泉邵先生始得拜觀諸葛武侯陸忠宣司馬文

正范文正韓忠憲公像畫史杜瑾所圖也五賢傳志詳  
馬李閣老西涯翁摘其要分錄于左摠跋之盡矣予獨  
慨賢才之遇之難也奉天蒙難聽贊既追仇盡言逐如  
棄梗德宗時也韓范同時柄用中外跂想其勲烈而群  
小不悅毀言日聞竟罷竟請外司馬為相已病天下共  
惜之予謂司馬不死相亦不終熙豐諸人固在也武侯  
三顧而起佐帝胄圖恢復專不失禮行君事而國人不  
疑炎祚幾熱而將星隕非天歟二泉托志忠雅識遂而



養充當天惟純佑聖天子興理唐虞之時終其遇而不患  
不盡其用其在茲歟

恩命錄後志

上世有門蔭例明堂郊祀等恩有冊授制授勅授贈封  
之典故甲族顯融無間綸書玉語複疊而駢蕃國朝大  
臣三品而上錄子官旨授在內三年成績得封五品而  
上與誥下與勅一品三代二品三品二代四品而下一  
代八品九品本身進之路狹故並美少錫之難故寶藏

為特重上宰泉山先生今錄俊得拜觀焉先生尊府撫  
州贈上宰公而下祖孫父子三世第進士前後荷褒寵  
誥十七道勅八道祖若妣六道父若妣八道先生若配  
九道子主事君庭棉若配二道林世稱德門毓和凝祉  
至先生尤盛問學淵委識邃而養克休休焉至方若圓  
至勇若怯溫煥若可親而居中栗不可柔知先生者容  
亦淺之知先生也廣平介而狹菜公大而疏先生兼其  
美而會其迹泯然者也先生在司成久上念之一歲三

轉官識者猶以為當朝夕贊天子訏廟謨張主國是留  
都位置非官宜夫人論至公也抑德必世世盛恒理耳  
安世之賢人莫竟其說仁傑再世有莫知天道之所以  
然先生作述無愧焉恩命稠疊非倖致而然錄之昭上  
貺也揚世美也迓續來休有隱望焉

題陳一夔太守像贊後

右大司冠盱江何公所作陳高州西潭像贊西潭粹雅  
精博頽然一儒者平生制作尤盛於詩可傳示後世無

疑者盱江贊不及蓋舉其重言耳盱江與吾鄉從吾彭公並擅時名而量稍異從吾博大盱江方整不當其意不少假顏色蒞屬尤嚴獨於西潭體貌若此視其贊可以知西潭矣三復起敬謹識其後歸之

題朱二守送行卷後

莆郡稱文獻蒞郡宿多鉅公近時尤楚楚可尚或曰守南郭王公賢也故寅貳皆賢子曰固也朱君士容先南郭郡丞者踰年有孝子劉閔者君首詣之延教社子弟

分月餽以給其母有巨盜江者任俠樹黨殆不可圖君擒殪之植良艾奸政之大無踰此君盖自得之南郭慎許可序文獨致重公其亦有所試矣

跋張東海小草千文

成化間張汝弼東海邵文敬半江蕭文明海鈞皆以草書名半江海鈞皆自謂當北面東海一時學書群宗焉東海天趣逸發筆力豪宕其大幅尤佳小書未盡其妙也詩信筆可傳播偉然一代人豪為時宰所忌僅知南

安吳僉憲出示此卷展玩之餘謹附于左

跋夏太守育才家譜後

遷史記大夫世家譜之作昉此宋歐蘓譜率為士夫所  
宗吉之隴州夏氏譜又叅互而廣加詳焉斷自號州為  
世缺所不可知蓋不可妄附以失本實此公敬甫諸君  
子脩譜之意今延平郡伯育才公訂成者也譜傳所載  
文莊公而下凡如干人圖系無聞者亦間有焉嗚呼崇  
韜拜令公之墓識者譏之蔡京之裔不敢目其祖直附

忠惠譜雖系世次子孫亦可感而興焉郡伯公廉實忠恕有時譽令公忠惠夙有志者俟其成績焉

菊跋

菊之華五色獨以黃稱韓魏公謂黃華晚節意凡菊皆然非獨黃也公本月令者也秋之季月菊有黃華菊黃為多從多而論抑秋金也金之品黃為上季月土也土正色為黃菊木屬而具是二行從其上從其正以黃稱歟未可臆為之說是賦一素一丹又莫知其指豈以寄

耶素其質而丹其中耶抑適情立象因而賦之不可知  
不可知然竊慨焉霜風搖落是菊以孱然數尺之幹與  
剛貞之梅後先以承晚匱亦難矣

跋李西涯墨蹟

成化間李西涯以文翰擅聲翰林吳匏翁稍後出與並  
蘓長公稱書象人形歐陽率更貌寒書徑刻正如其貌  
予謂文亦然涯翁澄潤故文極清永書晉法也匏翁雅  
醇故文極渾重書蘓體也皆逼真者評者謂逸少東坡



書皆晚年後工二翁弘治間書精爽尤不可及涯翁是書其龍駒鳳雛初年時也已自如此門下士林俊謹題

題淳熙贈黃知稼告身

右宋孝廟郊祀恩贈通直郎黃沃故父尚書考功員外郎致仕公度為朝奉大夫者也先是左丞相虞允文罷鎮蜀死右丞相梁克家曾懷葉衡相繼罷故闕龔茂良淳熙元年十一月李彥穎二年閏月俱叅知政事三年十一月赦恩四年四月告下故具名六月龔為曾觀黨

謝廓然所劾責放英州矣朝奉公號知稼黃旗樹屋應  
夢而生譙樓紫氣公遂大魁天下陳正獻公魁亞龔年  
十四在榜中紹興戊午也公獨位不過郎甫在宋五狀  
頭徐官至尚書陳鄭登二府吳大理少卿亦惟公位獨  
下然不濡跡姦擢完名純節正獻公相頴頴諸公間有  
慚色士之顯當時而名後世其果區區爵位之赫然者  
哉公裔孫廷宣解元世護舊物襲新綺而加池潢之捧  
以詣其舅氏俊公裔孫甥也盥手披閱志于左方

李長者誥勅跋

李長者宏封侯賜額誥勅理宗景定所予似道首相銜  
名在焉按秦壤溝洫而水利興然皆有司之事熙寧初  
安石導神宗興利始詔諸路勸誘脩陂塘圩隄議功旌  
寵長者起民間有事木蘭是詔也當時蘓軾所論劉摯  
等所疏程昉等之淤田利殆不勝其害獨長者陸海百  
里與離堆鉗盧相無窮故樂道之因附安石高竒起事  
為宋擾之始又惡夫似道之相宋無日矣

雜著

鸚鵡翡翠解

滇之西多鸚鵡群千百以飛啄松子林頃之且盡土之  
夷腊之執彈而臨之應弦下以死其一嘴爪如丹毛五  
采錦以絢夷求生致之羅四面數日乃得得則架而懸  
之飼以穀若黍而通之語言以購重直即翡翠者陋以  
機增繳中則利其羽而肉棄之因感莊生鳴鴈韓子二  
鳥之篇而重太息焉彼均羽毛之異而壽夭殊者其用

異也易之則亦云爾宰物者之為翠累亦誠悲歟抑固材而死也鵠胡為耶食人食言人言以隳誤人事生亦良贅矣

舟神紀

蕭晏公者名善水江之舟多祀焉昕夕撞鼓磬為樂發必告止必報牙日必祭風雨盜竊現恠物必禱焉舟人窮寧死不復神恠一進止失據市酒實甌肉實盆拳踞蒲伏道罪過縷縷以紓神怒成化甲辰予謫姚州倅附

客舟泝洞庭目感且褻心厭之一日颿遇風疾駛柁師  
弛柁職罔共舟觸灘狶突撼頓益膠弗可解棹數艦俱  
絕予謂登若貨器勢易與弗能從也夜虞盜寘道里費  
神間逆盜懼弗檢也再信衆如予言果脫走謝神予適  
往收費衆誤為禱也曰公舉辦香如響因以謝予予不  
顯為辦嗚呼情而膠輕而解人則云然神奚怒奚功也  
亦豈辦香能喜况未必然耶有大于是者得予言而從  
之庶幾乎其無惑以理矣

鼠雀對

有高其倉而儲者群鼠下食之不得上飽以暵死其一  
困猶生守倉奴得之四足而釘之執細荆而詰之鼠瞑  
目短氣死復蘓首若自服口唧唧若伸辯狀鄰叟善滑  
稽給奴曰吾能通禽獸言鼠有所訴奴曰何訴曰鼠亦  
毛而族耳馬牛犬豕以其用也食主人之食鼠賤生無  
所用亦天地間具物耳耳目口鼻何異馬牛犬豕饑食  
渴飲為欲同情也主人不憐而與食盜而食為辱亦甚

矣以微命博一飽暍死肩並主人不相憫而相罪多見其忍也夫雀翼而飛百什而群鬼入而神出耗主人之食亦衆矣又惡得而詰之奴停鼠羅雀扒如鼠而毒焉雀陽死鳴悲叟曰亦有所訴曰雀鵞鴈而族耳肉不登俎且其無用同其具物天地又同饑食而渴飲有聞哉鼠奚知鼠而不知雀也雀可死鼠亦可死獨雀死乎哉鼠曰吾之群無汝之多疾飛遠逃無汝之便雀曰吾棘棲而野食不得已而食主人之食入其羅主人之子籠



閣粒飼撫而愛之有愛汝者乎穴墉穿牆破衾敝帷喫  
紙浣書翻盆倒盎使主人食常廢匙卧不貼床席吾盜  
雖多其取厭顧出汝之下鼠奚雀之連鼠則語塞雀曰  
無憂吾汝之腸費亦良尠矣奴亦以用而食主人之食  
飫口撐腸刺齒捧腹携挈群侶倒卧林樾而屋頽弗支  
垣敗罔飾畦蔬廛禾荒死枕籍然猶異菓先嘗嫩雛潛  
炙削分隱錢匿丈謾石以私其身圖而肥厚其妻子耗  
主人無鼠雀倍耶奴嚼齒髮指臨之甚戚既而思曰吾

過矣遂釋雀與鼠澡身浴德窮智役力先主人憂而忘其妻子之急寒不知衣飢不知食出入戴星風雨不得息不再歲屋堊如新垣補就密桑梓屯雲稷稼蔽日萊闕庾陳主慰家實專倚隆眈群奴莫加焉方悔雀言之晚揖隣叟而謝之叟曰是給也吾借以風耳夫吏于公者皆奴也胥史廝役皆雀也盜鼠也盜之害下於胥史廝役而取厭于吏盜尤甚治盜而不先胥史廝役蔽也不自治其身又何治於胥史廝役哉奴曰甚善書以為

吏告

馴虎解

廬墓孝子之自致非常也售偽者往往舉馴虎與白鳥  
甘露為例以為孝徵夫昭昭人耳目事猶假自文如近  
世元臣白鳩白鴈舉朝有詩可盡信乎抑為誣猶近也  
虎遶屋越垣卧廬側容有之容知其馴耶手而撫之搖  
尾帖耳如犬之服習投之食張口而授耶制虎醫虎虎  
服罪恠者也渡河之對抑誠偶然者周公聖人也驅

虎豹而遠之何彼勞而此之逸也近虎為莆患一捕獲之二虎又為患又連捕獲之朝令而夕奇應何神也記成化時虎亦為患懸重賞致之連獲三十虎噬者不獲二年乃獲又何其滯也所謂偶然者無信耶噫斯生人之幸不幸也曰然則紀之者誠神其誣耶曰信及豚魚是類也以立教也不紀無以勸化不紀無以勸孝君子寧受人之誣而不忍絕人子自致其親之善

郭巨辯

巨埋兒有諸曰慈孝一道也世無虧慈而能孝者參養  
皆每食必問所與與孫尤人情母愛之矣弗所愛非順  
也况忍之遠之已過矣况埋之耶母繼有孫之問欺可  
乎告之可乎難為巨之詞矣使母痛其孫以吾故恨死  
悲巨貧不食死難為巨之書矣春秋以趙盾正卿不討  
賊書弑巨弑母矣母固無恙巨不得厚孝以絕父子之  
倫矧無後亦禮所謂不孝胥失之矣殺子事君殺子事  
母歸一也巨與鄧攸事頗類議者不以右攸則不得右

巨矣曰然則何以紀曰巨孝有之得金容亦有之掘地  
非埋兒也曰然則丹書足信乎曰尤無謂好事者將神  
巨於孝不知說之邪陷巨於惡教天下蔑倫巨始也作  
郭巨辯

毒虎解

游洋縣萬山中竟以虎廢食土之毛者利之猶時阨于  
虎若永之蛇然無能易者也正德戊寅虎乳二子益酷  
閃形貿跡風至而鬼藏率徙踰一舍獵師至無所覓山

落嗣以虎告獵師至復無所覓居人患之約蓄信毒虎  
虎一日噬蔡氏僕主率鄉之人逐之虎釋僕去已數肉  
虎口矣以為廢物遂議啖虎以特脫鄉禍刳其肉實信  
寘釋所虎食之盡果死或言二子亦死意未然也後數  
月無虎患人功蔡氏子曰虎之毒善矣非處僕也僕固  
賤人耳非牛羊豕例也人不幸食於虎瘞其餘猶足一  
慰奚至割肉而盡委之虎耶嗚呼何斯人之重不幸耶  
曰然則毒虎非歟曰牛羊豕則是人則非虎之死有自

忍亦有屬矣作毒虎解

侯軒解

侯侯之也易履之九二曰履道坦坦幽人貞吉上九曰  
視履考祥其旋元吉皆泰之地故繼之以泰君子行法  
居易以俟天也德成君用之學至君求之我無預也而  
命之天者自至有侯之象焉故曰侯聖賢立言垂範以  
善導民而不欲利誘之斯意也其不然固有侯而得而  
不得亦恒多矣藝侯穫而食也而未必得食侯蚕而衣



而未必得衣俟之身有終於不過俟之子孫有終於索然而不自振命有定有不定也有定而無不定其在我歟故曰學者為己謀利計功淺乎其所尚也夫德俟其日新學焉俟其日益以造高明正大之域得則喜不得則惕惕然以悲懼來者之無多而光陰過鳥之不足恃俟之至也姻友陳君玉光先侍御居易公佳子居易公俟之身不獲矣俟之後之人叔氏郡伯石峰君副之矣君又副之說者擬之二方夫得之在我而又得之在天

得所俟者作俟軒解

泣麟解

馬圖龜書文明之符也夫靈氣之鍾人與物共之伏羲  
神禹執其機馬龜宣其應感聖人之時為聖人出也周  
之時鳳鳴岐山矣而文王繫卦周公繫爻辭河圖大昌  
武王訪道得洪範而洛書載顯吾夫子何時也姬德衰  
賢聖之君不復作世網人紀蕩蝕無餘在圖為否為剥  
書咎徵六極時也夫子猶有望夫行之端鳳至圖出深

有與而不符周公之夢遂絕矣由是假行事於魯史以脩春秋以言誅亂賊而正王法授為邦之意於顏子重其寄於淵也而擎天未力一臂先失淵蚤死人之麟先踣矣麟胡為乎來哉胡為而不踣以斃于鉏耨之手哉人靈於物聖人靈於麟夫子畏於匡伐木削迹於宋於衛厄於陳蔡盜蹠幾不脫虎口者屢矣麟胡為而不殆楚狂知鳳之衰夫子必知麟之非其時及禍哭麟哭回也傷道以自傷也始感麟而生終感麟之斃以絕均不

遇也抑夫子素王也麟感素王之時為素王出而文成  
方至與韶成致鳳無異夫子賢於堯舜麟何亞於龍馬  
神龜五時之祀出而改元麟雖遇何指哉

木蘭閒劇

木蘭病夫今之怪民也畫史鄭玉濬圖其像陳黃門方  
壺樹石之人與境備矣見素子素知之素忘之也詰而  
語之病夫何泮渙爾濯落奇崛如是邪儲汝精範汝形  
館汝過客溷一駿於深售與二鳥之光榮籠囚羅致弗

樂也白駒皎皎孤鴻冥冥而任而真素鷗野鶴海上之  
風雲繡峪蒼崖山間之月日挂索抱甕草衣木食局下  
氣高心長步窄孤請劍於百懷與舉墻之一力填海奚  
情集木若失在當時表著敢歷一堦若叙述數君子又  
悲夫無徑之可入繆嘗學埋輪倣運甓憂係希文病竊  
君實可望焉不可至也雪壑往夢烟邱疇疾陰風畫寒  
使我心惻慨吳萼以孤往撫陶松而自適何望乎潁水  
箇瓢東山兩履已矣乎病夫朝茵露槿是人也月榻雲

龕卧隱少室神遊東所意往方石奉時化以周旋與身  
命而俱畢病夫曰是何有于是吾忘我矣

題以吉卷

吾家御史中丞兄季子以吉御史學古道陽明子既告  
之矣因屬就正於予予耄懶茫乎無得也然樂善予性  
也况鄉耶况同林氏耶况中丞予道義友莫逆無異兄  
弟固子視而愛之學古道固幸而輔掖之矣夫古故也  
已然之迹也善樂者必按譜屈伸俯仰綴兆舒疾惟所

用之善鑒者必按方表裏虛實升降補瀉惟所用之故  
樂節而藥用神師曠秦緩其無能易也夫聖者視天為  
至也故曰聖同天賢者視聖人為至也故曰乃所願則  
學孔子未至於賢又以賢為至也故曰學顏子之所學  
躡而求君子之所病也道至孟子而著至朱子而又著  
希聲絕響超見獨識意領而神會若是其難也朱子鄉  
先進也以吉以朱子為至朱子學焉吾家江陵邵州忠  
義之祖也嗣先嗣宗又孝義之祖也以吉以祖為至其

假外求哉昔張魏公巍然物望教南軒以仁義忠孝古  
聖賢自期其後南軒友朱子博約詣妙遂厠道學之傳  
中丞諸子於以吉尤奇愛其教以吉當不異魏公不知  
相博約有如朱子否也夫無其人有其書有其心焉耳  
矣人則固在也速効銳進中道而止與偏而盡事君子  
者弗由也吾於以吉隱乎哉語以吉語達也

聯桂族範

凡林子孫父慈子孝兄友弟恭夫正婦順内外有別尊



幼有序禮義廉耻兼脩四維士農工商各守一業氣必  
正心必厚事必公用必儉學必勤動必端言必謹事君  
必忠敬居官必廉慎鄉里必和平人非善不交物非義  
不取毋近聲色毋溺貨利母親喪不葬細行不謹毋信  
婦言傷骨肉毋言人過長薄風毋忌嫉賢能傷人害物  
毋出入公府營私召怨毋奸盜刁詐飲博鬪訟毋壞名  
喪節災已辱先善者嘉之貧難死喪病疾周恤之不善  
者勸誨之不改與衆棄之不許入祠以共綿詩禮仁厚

之澤敬之戒之母忽

家範

吾林子孫父慈子孝兄友弟恭夫義婦順内外有別長  
幼有序嫡妾有分子弟有學貧難相救昏喪相助各治  
一業毋干外事毋好遊逸毋學賭博毋近聲色毋涉勢  
利毋信婦言毋及人過立志必希文為學必仲晦居官  
必閑道處鄉黨必彥方自期婦女必貞潔必勤儉必絕  
淫妬臣不事二君女不嫁二夫以共綿忠孝之澤敬之

戒之母忽

卷二十八

跋孝友堂卷

族弟賢卿稱孤時髮未總身無所棲無所恃為衣食力學以基母養以均飽其二兄令而歸僅市小屋硯確田數畝合群從食之夫孝友植綱常而匡世化者也重所由出固也又重所同出難賢卿之境又難也古者子弟分以業而責成功時其入而量出之故可繼可久緝貞規垂令式五世十世百世可也

孝友堂跋

李贊皇疲一生於平泉草木之間其遺戒有壞一草一木者非吾子孫不知草木之不壞所以速李氏之壞也予素不畜奇物安取敝敝然護植之勞與觀者之酬應哉善立家者孝友維屬數百年呂榮公崔山南兄弟子孫之盛可槩也贊皇移戒于是安有洛陽有力與梨園別墅之取者哉詩曰謀之不臧則用是違吾聞憲使寧川周公儀堂名孝友取三家家法為維屬地者噫得

所貽矣

懷諸老二十六詩小引

正德癸酉端月二十又四日華亭定庵曹先生夢俊以  
玉盃及編次國朝典章合五經者一帙遺先生覺而報  
曾孫生先生詩志喜錄以遺俊正德丙子夏也先生詩  
素名筆精入妙人品又素高八十五歲人辦此三絕尤  
世獨見持示子姪傳觀之至不可問冬之季始還寘架  
間得之甚幸時久不作詩未敢擬和挾遊木蘭偶和得

助喜二詩又得壽先生二詩又得壽邃庵楊先生二詩  
暮歸文惟近時林下大老深相知與跡疎味合承相念  
者謝先生方石張先生介庵劉先生東山儲先生殖庵  
皆已古人而山斗歸然可望不可即者未能已尚慕離  
合之盛積數日又得奉懷木齋謝先生守溪王先生楓  
山章先生洪洞韓先生休齋沈先生九峰孫先生二泉  
邵先生絅齋戴先生西泉曹先生與自述各二詩用道  
遙臆與吾衰之感而詞氣蕪索重學落之悲名德素心

今皆安在哉是月五日燈下某志

鄉飲酒跋

養老虞夏已然鄉飲酒義周備矣所以免於人禍也政教之本也仁義接者也明尊長養老也故民知敬讓孝弟立而國家安聖人制之孔子曰吾觀於鄉知王道易易也漢鄉三老著在令甲逮顯宗始勤臨雍之拜我聖祖德音渙頒守臣祇服焉禮讓為國乎何有近惟故事殆不足訓矣

題宋太祖擊毬圖

此陳董學峰湖家藏宋宮中本也元錢舜舉得而臨之其筆勢圓熟神氣飛動為畫家獨品宋太祖太宗而下人誌之第不書何時事意未稱帝時也君臣同遊故不若是褻守信昭輔進固武流普謀國元臣與主對鞠失君臣體太宗觀鞠體亦非是責善父子難帝固英明主也自馬蹶悔獵言固易聽重以普帝所重耶昔韓退之諫張僕射擊毬以人馬勞佚壽夭為喻唐僖宗自謂擊



球狀元優人石野豬曰恐堯舜為禮部不免駁放普無愧退之無愧優人耶為責備惜之

題邃翁贈辛庵卷

少傅楊邃庵公起神童壯猷茂學宿德鴻聲功華夷而表儀朝著幾先孤舉今天子虛懷以待璽書存問使相屬卜泰平起公屢屢焉公厚吳文定公劉忠宣公李文正公尤道義許與者也公贈彭辛庵翁詩西涯去後誰知已南有素翁北幸庵翁精忠駿節舊德元功予不誠

類也然亦繆公知己贈予詩有古道百年君與我之句  
昔昌黎友東野予東野為類君實之於景仁翁殆景仁  
過之抑郭有道河南友李元禮汝南友黃叔度吾夫子  
友子產於鄭於衛友蘧伯玉有道遯庵未甘北面而尤  
於夫子願學也吾二人四子何居謹幸庵翁請質焉

跋趙松雪柴桑書畫

陶靖節先生白描小影凡十四書事跡如之相傳元趙  
文敏公手作李龍眠本也畫格書品筆勢圓熟要非文

敏不能近世士夫家往往得之是本貳司寇吾友顏公  
梅田襲藏本也或疑畫本之多要非真本予謂政不必  
真也二公底裏故異文敏對靖節寧無愧容敢附手墨  
以備書前懿繪處士逸像如此者謂無一真亦可也

盡我箴

族子以吉乞告歸復起為御史來求言作盡我箴與  
達與輅誦之

形化散殊萬景一我我具天地參焉維可御氣圉情坊

心繕性廣厚高明仁義中正脩辭立誠窮理盡敬博約  
會通慎密鎮靜體生者德任道者身臨深履薄若對神  
明維實維有歟焉若虛我恒不足人若有餘毋曰人畏  
曷先畏已澡刷彌縫緝熙敬止毋曰責人而忘自責誦  
處陰籌醜好奚擇我盡吾我稱物平施如度之度如衡  
之持我盡吾我乾健坤順日進無疆動益以巽我盡吾  
我貞固弗貳素位而行夷險一致我盡吾我人縮我先  
不我者天任其自然

阜俗三義

巡撫都御史林為阜俗事竊惟王政之大養生復性送死而已然官府事泛難於徧施鄉曲情親易以時叩預備有倉未足應朝夕之求郡邑有學未足周鄉閭之化近闢有漏澤未足使偏村下聚各歸於其土今立三義示爾齊民胥勸互成裨我官政表厥之典三全具錄一盡特書幸毋自沮以鼓舞大化會歸我皇之極

盡一義者官為

扁一義之門二義三義稱是社無富家數戶朋舉扁曰義社

一義倉照得江西預脩雖設事頗具文常平甫基官乏  
糴本足應緩急尤屬義倉其割羨餘置別庾六百石四  
百石量力而為一斗息二斗息視貧而定使同社絕生  
塵之釜均舉火之家不償者不借既死者量免倘樂備  
千石尤利博一鄉庶社倉祖仲晦之謀不勞官本義倉  
溥九韶之惠可厚民風善無不報義在必行

一義學照得江西家攻儒業尚阻困窮囊溢學金竟安  
愚賤懋建義學賴爾社人其延學行名師訓誨子弟館

資師贄專出本家口授經承泛及同社使貧家有育才之幸無學課之憂學成資以儒服進于官庠倘師專較利則主另擇明庶劉允迪義學嗣爾古風萬石君義門允多名士世間好事毋讓人為

一義塚照得江西風水賈禍拘忌停喪佛法流誣循習火葬仁及枯骨義塚是圍城居者量市近郊鄉聚者相觀平阜擴數畝便地惠合社貧民序列深葬表志氏名使生得近隣死得近穴倘仍助棺之費益加積善之基

庶陳向漏澤裨葬朽之周文危頑義塚贊掩骼之呂令  
天惟佑德里是稱仁

禁約民害

巡撫都御史林為禁約民害事訪得江西商民輻輳軍  
校清雜有等光棍喇唬專一生事害人如蓼州等處牙  
行經紀結黨合群得過者把持行市故阻客貨賤攬而  
貴賣名曰屯船貧難者哄弄孤客故尋事端掇籌而混貨  
名曰簽大會串同鋪家瞞騙客錢名曰打夾帳傾銀匠



上梅刮錫名曰畫絲抵搭沉鉛灌銅名曰包皮吊角校尉強買貨物包取腳錢把持河岸名曰把頭軍快指以巡邏私通盜賊詐害平人名曰綽露水在途爭鬪群兇助打名曰傍不忿提買貨物抵換原銀名曰撮包子秤尾抹膠黏帶碎銀名曰黏乾鵲鋪行船家糶賣米穀手例斗斛名曰打雞窩私結盜賊賤買贓物名曰接短頭遭風失火搶搬財物名曰趂閑打劫指稱衙門誣詐名曰撞太歲停住囚犯打點名曰穿珠眼白身衙門營求

勾當名曰野牢子跟隨坊甲下鄉提人名曰送喪吏農  
承差身死而弟姪頂冒名曰茅鬼問革而隱匿復克名  
曰還竟書手久戀衙門掌案作弊名曰主文攬納官糧  
買米私賣乾籌名曰起倉擅入府第保債勒取信錢名  
曰領頭捏寫詞狀教唆索錢名曰掉筆頭偽造印信詐  
撥吏農名曰假布政此等民害里長戶長社長社正推  
奸不舉巡捕巡司總甲小甲容情不拿本合通究緣循  
襲之有年恐自新之無路姑記禁約為此示仰前項惡

徒俱要改過自新本等生理應首官者首官改正敢有  
仍蹈前非許巡捕巡司里長戶長社長社正總甲小甲  
指實呈來從重問發敢有容隱通行追究使風俗還醇  
奸偽無托若乘機挾仇報怨罪亦不私巡捕朔望具不  
致縱容各民害甘結繳報湏至出給者

見素集卷二十八